



Bosna i Hercegovina
Federacija Bosne i Hercegovine
Srednjobosanski kanton/Kanton Središnja Bosna
Kantonalno tužilaštvo Srednjobosanskog
kantona/Kantonalno tužiteljstvo Središnja Bosna
Travnik

Broj: T06 0 KT 0037347 25
Travnik, 26.01.2026.godine

OPĆINSKOM SUDU U TRAVNIKU

-Sudiji za prethodno saslušanje-

Na temelju odredbe člana 45. stav 2. tačka i) i člana 241. stav I. Zakona o krivičnom postupku F BiH (Službene novine Federacije BiH, broj 35/03, 37/03, 56/03, 78/04, 28/05, 55/06, 27/07, 53/07, 9/09, 12/10 i 8/13, 59/14 i 74/20) podižem:

OPTUŽNICU

Potvrđena dana 11.02.2026. godine

Protiv:

- 1. Udruženje za uzgoj Bosanskih bikova Peran Busovača,**
- 2. Z. T.,**
- 3. B. T.,**
- 4. J. B.**

Što su:

Dana 19.04.2024 god u Vitezu , u ulici Stjepana Radića, na parceli zv Impregnacija u Vitezu, Općina Vitez, pravno lice Udruženje za uzgoj Bosanskih bikova Peran Busovača, postupajući preko svoje odgovorne osobe, kao organizator i nosilac aktivnosti, odgovoran kao pravno lice u smislu člana 128. tačka a KZ FBiH gdje je propisano da smisao krivičnog djela proizilazi iz zaključka ili odobrenja rukovodećih ili nadzornih organa pravne osobe, svjesni zabranjenosti takvog postupanja i htijući to, protivno odredbama Zakona o zaštiti i dobrobiti životinja

Federacije BiH, (Sl. glasnik BiH 25/09 i 9/18), organizovao je i omogućio održavanje nezakonite borbe bikova, pri čemu je javno okupljao građane, naplaćivao ulaznice i ostvarivao imovinsku korist, obezbijedio prostor, logistiku i reklamiranje događaja, čime je grubo povrijedio propise o zaštiti životinja i ugrozio javnu sigurnost i kojom prilikom je jedna osoba zadobila teške tjelesne ozljede, na način da je preko odgovorne osobe Z. T. koji je zajedno sa B.T. i J. B., suprotno odredbi člana 4. tačka f) Zakona o zaštiti i dobrobiti životinja, gdje je propisano da je zabranjeno,“ Provjeravati oštrinu životinje na drugoj životinji, huškati jednu životinju na drugu, te priređivati borbe životinja, uključujući borbe pasa, bikova, medvjeda, pijetlova kao i svih ostalih životinja“; početkom aprila 2025 koristeći Udruženje i njegov pečat, organizovali borbu bikova, nakon što su pozivajući se na „Pravilnik o uslovima i načinu organizovanja sportskih nadmetanja životinja“, (Sl.glasnik BiH br 44 /10)koji je u direktnoj suprotnosti sa Zakonom o zaštiti dobrobiti životinja, prezentujući da planiraju organizovati tzv. kondiciono nadmetanje bikova, prilikom sačinjavanja zahtjeva tj. podnesaka institucijama u SBK, koje je u ime Udruženja kao predsjednik potpisivao Z.T., otpočeli organizaciju i organizovali manifestaciju pod nazivom korida tj. borba bikova, koristeći termin sportsko nadmetanje bikova, tako što su, na prostoru koji nije imao odgovarajuće sigurnosne uslove, da primi veći broj građana, a koji predstavlja parcele 1526/4,1526/5 i 1526/6 zvane IMPREGNACIJA, na kojoj su improviziranom drvenom ogradom označili borilište - arenu za borbu bikova, a za koje parcele je J. B. Ministarstvu privrede SBK i PS Vitez dostavio nevažeći dokument, svoj Ugovor sa Hypo Alpe Adria Bank iz 2014.godine o pravu raspolaganja nad navedenim prostorom, za period od 10 godina, tj do 2024godine, iako je stvarni i upisani posjednik B.D. M., te od Ministarstva privrede SBK, izdejstvovali Zapisnik o navodnom ispunjavanju tehničkih uslova, prostora za održavanje manifestacije - koride, koji su potpisali B. P. i A. S. ispred Ministarstva poljoprivrede, vodoprivrede i šumarstva SBK, i J. B. kao podnosilac zahtjeva, te su pribavili Rješenje Ministarstva poljoprivrede vodoprivrede i šumarstva SBK koje je potpisao ministar A.A., te Rješenje od PS Vitez, kojim se odobrava javna priredba, tradicionalno sportsko nadmetanje bikova Viteška korida od PS Vitez od 16.04.2025.godine, pa iako nisu obezbijedili sigurne uslove za građane, odnosno postavljanje adekvatnih fizičkih barijera, otpornih na udar ili pritisak bikova, kojima bi se onemogućilo da bikovi iz borilišta ili sa drugih prostora uđu ili upadnu u prostor gdje se nalaze građani, i nakon što su putem društvenih mreža i plakata koje su postavili oglasili održavanje navedene manifestacije - borbe bikova za dan 19.04.2025.godine kada je, dakle na sam dan održavanja manifestacije i kantonalni veterinarski inspektor A.S. sačinila Zapisnik o inspekcijskom nadzoru, na kome je konstatovano da su ispunjeni uslovi za nadmetanje bikova bodača, koji je potpisao za Udruženje Z. T., pa su tako otpočeli navedenu manifestaciju na koju su se nakon što su ih kontaktirali kao organizatori prijavili i na kojoj su sa svojim bikovima učestvovali sa oko 30 bikova i drugi vlasnici bikova, među kojima su E. i M. M., M.Ž. i dr., te pošto se na istu manifestaciju odazvalo oko 2300 posjetitelja, koji su u navedeni prostor ušli nakon plaćanja ulaznica koje je obezbijedio B.T., te pod takvim uslovima iako svjesni da usljed njihovoga činjenja može doći do ozljeđivanja ili bikova ili građana ali su olako držali da do toga neće doći odnosno

da će to moći spriječiti, pa su otpočeli održavanje manifestacije, borbe bikova, uslijed čega je istoga dana u popodnevnim satima, u jednom momentu, kada se održavala finalna borba, između bikova vlasništvo E. M. i B. T., jedan od bikova u toku borbe, uslijed pucanja improvizirane ograde, nekontrolisano upao u prostor gdje su se nalazili građani, kada je došlo do ozljeđivanja mladb. M.Š., rođen 22.07.2014.godine koji je zbog zadobivenih ozljeda prebačen u Kantonalnu bolnicu Zenica, gdje je nakon konstatovanja da je zadobio tjelesne ozljede u vidu prijeloma lijeve nadlakatične kosti, nagnječenja sa oguljotinom kože lijeve ruke, nagnječenje lijeve strane grudnoga koša sa oguljotinama kože i oguljotine desne strane lica koje u svom zbiru predstavljaju tešku tjelesnu ozljedu, zbog čega je i zadržan na liječenju.

Dakle, kršenjem propisa organizovali nedozvoljenu aktivnost i opće opasnom radnjom, nehatnim postupanjem na mjestu gdje je okupljen veći broj ljudi doveli u opasnost živote ljudi pri čemu je jedna osoba zadobila teške tjelesne ozljede.

Čime su počinili krivično djelo: Teška krivična djela protiv opće sigurnosti ljudi i imovine iz člana 328. stav 1. a u vezi sa članom 323. stav 3. u vezi stava 1. KZ FBiH. a sve u vezi sa članom 31 istoga zakona.

Nakon provedenog glavnog pretresa tužilaštvo će staviti Sudu prijedlog da se optuženi oglase krivima za predmetno krivično djelo te da se obzirom na njegovu vrstu i društvenu opasnost, i način izvršenja,

- Udruženju za uzgoj Bosanskih bikova Peran Busovača:

- a) shodno odredbama čl.135.stav 1. tačka a) i član 136.stav 1.KZ FBiH izrekne novčana kazna koja ne može biti manja od 5.000,00 KM niti veća od 5.000.000 KM)
- b) shodno čl.142. KZ FBiH izrekne sigurnosna mjera objave presude u sredstvima javnog informisanja,
- c) shodno odredbi čl.143.KZFBiH izrekne mjera sigurnosti zabrana obavljanja djelatnosti- organizovanja borbi bikova, sportskih nadmetanja bikova i svih manifestacija u kojima se životinje sukobljavaju.

-Osumnjičenima Z. T., B. T., J. B., shodno odredbi člana 71. c. izrekne mjera Zabrana vršenja aktivnosti-organizovanja borbi bikova, sportskih nadmetanja bikova i svih manifestacija u kojima se životinje sukobljavaju.

KANTONALNI TUŽILAC

Poštovani predstavnici medija, molimo Vas da prilikom prenošenja vijesti imate u vidu da osobe na koje se odnose vijesti i informacije iz Kantonalnog tužilaštva Travnik, imaju status osumnjičenih ili optuženih osoba.

Podsjećamo na načelo presumpcije nevinosti koje definiše da se niko ne može smatrati krivim dok mu se krivica ne dokaže pravosnažnom presudom